

Ikiaroorartut pillugit Namminersorlutik Oqartussat nalunaarutaat

Ikiaroorartut pillugit Inatsisartut inatsisaanni nr. 24, 25. november 2022-meersumi §§ 1, 2 aamma 4 aamma § 5, imm. 2 aamma 3 naapertorlugit aalajangersarneqarput:

Nassuiaatit

§ 1. Nalunaarummi uani ikiaroorartut pineqartut imatut paasineqassapput nakorsaait, naasut naasuniillu nakorsaasiat, nalunaarummut allattorsimaffinnut A-mut, B-mut, C-mut, D-mut E-mullu ilanngunneqartut kiisalu tarajornitsut aammalu ikiaroorartunit pineqartunit pileriaannaat. Tassunga ilanngullugit esterit æterillu, ikiaroorartut taakkulu tarajui imaluunniit taakkunanit pilertut akoqanngilluinnarnersut, ilaannakortumik sanaajunersut, pinngortitameersuunersut akuutissanilluunniit sananeqarsimanersut apeqquataatinnaq. Ikiaroorartunit taamatuttaaq paasineqassapput piareersakkat allattorsimaffimmi ikiaroorartunit, naasunik naasuniillu nakorsaasiassanik kiisalu taratsunik ikiaroorartuniillu pineqartunit pileriaannarnik taaneqartunik akullit sananeqarsimasulluunniit tamarmik, taamaattorli imm. 4 takuuk.

Imm. 2. Imm. 1-imi taaneqartunik allattukkanik nutarsaanissap pisariaqarnera pillugu Naalakkersuisut ilisimatinneqarnissaannut Nunatsinni Nakorsaaneqarfik pisussaaffeqarpoq.

Imm. 3. Sanaanik pineqarput: arrortitat, kimikillisakkat, tangit qalatat, kimittusitsinerit, imigassami arrortitsinerit, sunilluunniit nakorsaasiornikkut nakorsaatisat, kiisalu ikiaroorartunik aamma naasunit nakorsaasiassanik piareersaanerit, taamaalluni ikiaroorartut pissutsimikkut allanngortinneqarnatik.

Imm. 4. Ikiaroorartunut qulaani taaneqartunut ilaangillat allattorsimaffimmi B-mi nr. 59-imut eqqaanartut taakkuningalu piareersarneqarsimasut naasunit nakorsaasiassat, piumasaqaatit uku naammassineqarsimappata:

1) uumasunit naasuniilluunniit nakorsaat imaluunniit sanaaq annerpaamik 0,2 pct.-imik tetrahydrocannabinolimik akoqarpat, aamma

2) uumasunit naasuniilluunniit nakorsaat imaluunniit sanaaq Nunatsinni Nakorsaaneqarfiup akuerisaanit eqquusuisut arlaannit nunamut eqqunneqarsimappat, tak. § 9.

Allattuiffimmi A-mi, B-mi, C-mi, D-mi aamma E-mi allanneqarsimasunut ikiaroorartunut aalajangersakkat nalinginnaasut

§ 2. Ikiaroorartut allattuiffimmi A-mi allanneqarsimasut nunami nunatsinneqqusaanngillat, Nunatsinni Nakorsaaneqarfik immikkorluinnaq pisoqarneratigut aamma erseqqinnerusumik aalajangersarneqartumik

piumasaqarnikkut tamatumunnga akuersisimanngippat.

Imm. 2. Imm. 1 malillugu akuersissummut ilaasut eqqaassanngikkaanni ikiaroonartunik imm. 1-imi taaneqartunik eqqussineq, annissineq, tunisineq, pisineq, tunniussineq, tigusineq, sananeq, piareersaaneq paarisaqarnerlu inerteqqutaapput.

§ 3. Ikiaroonartut nunami maani taamaallaat nakorsaanissaq imaluunniit ilisimatusarnissaq siunertaralugu atorineqqaqusaapput.

Imm. 2. Ikiaroonartunik eqqussineq, annissineq, tunisineq, pisineq, tunniussineq, tigusineq, sananeq, piareersaaneq paarisaqarnerlu taamaallaat nalunaarummi matumani aalajangersakkat naapertorlugit pisinnaapput.

Tunniussineq

§ 4. Nakorsaatit pillugit inatsisartut peqqussutaat naapertorlugu malittarisassat matumunnga aalajangersarneqartut naapertorlugit ikiaroonartunik nakorsaatissatut atugassanik tunniussinissaq taamaallaat akuerisaavoq.

Tigusineq paarisaqarnerlu

§ 5. Ikiaroonartunik tigusineq paarisaqarnerlu ukununnga taamaallaat akuerineqarpoq:

- 1) Inuit ingerlataqarfillu malittarisassat qaquguluunniit atuuttut naapertorlugit nakorsaatissanut allagartat imaluunniit allagaq naapertorlugu ikiaroonartunik tiguisut, imaluunniit nakorsaatinik nassiussuineri malittarisassat atuuttut naapertorlugit uumasut nakorsaannit imaluunniit nakorsamit ikiaroonartunik tiguisut.
- 2) Inuit katsorsartinnermut atatillugu nakorsamit, kigutit nakorsaannit, umiarsuup naalagaanit imaluunniit timmisartortartut naalagaannit ikiaroonartunik pisartagaqartut.
- 3) Pisortanit pigineqartut pinngortitalerinikkut, nakorsatut ilisimatusarnermi atortorissaarutitigullu laboratoriat ingerlataqarfillu laboratoriami imaluunniit pisortat suliffianni pineqartumi pisortap arlaannit atsiorneqarsimasoq allagartaq naapertorlugu ikiaroonartut ilisimatusarnermi atornissat siunertaralugu ikiaroonartunik pisartagaqartut.
- 4) Nunatta Nakorsaataasivia, nunap immikkoortuini napparsimmaviit, peqqissaaviit, peqqissaasoqarfiit il.il., aammalu uumasut nakorsaat.
- 5) Inuit, suliffeqarfiit, laboratoriat ingerlataqarfillu Nunatta Nakorsaaneqarfianit matumunnga akuerineqarsimasut.

Toqqortaatit

§ 6. Nunatta Nakorsaataasivia, nunap immikkoortuini napparsimmaviit allallu ikiaroonartunik tunniussinissamut pisinnaatitaasut ingerlatsinerup nalinginnaasup attannissaanut piumasarineqartunit allanik ikiaroonartunik amerlanerusunik uninngasuuteqaqqaanngillat.

Imm. 2. Ikiaroonartut Nunatta Nakorsaataasiviani, nunap immikkoortuini napparsimmavinni, peqqissaavinni, peqqissaasoqarfinni il.il. aammalu uumasut nakorsaarfinni, ikiaroonartut nakorsaatit

pillugit Inatsisartut peqqussutaat naapertorlugu aalajangersarneqartumi tamanna pillugu malittarisassat atuuttut malillugit inissinneqassapput.

Imm. 3. Ikiaroornartut illersorneqarsinnaasumik aamma inunnit susassaqanngitsunit tikikkuminaatsuni kiisalu inuussutissanit inuulluarniutiniillu immikkoortillugit inissinneqarsimassapput.

Imm. 4. Ikiaroornartut illersorneqarsinnaasumik poortorlugit imarisaatalu taaguutaanik nalunaaqutserlugit inissinneqassapput.

Nioqquteqarneq

§ 7. Ikiaroornartunik nioqquteqarneq Nunatta Nakorsaataasivianut aamma nakorsaait pillugit inatsisartut peqqussutaat malillugu maleruagassat aalajangersorneqarsimasut malillugit, nunap immikkoortuisa napparsimmaviannut kiisalu inunnt suliffeqarfinnullu Nunatsinni Nakorsaaneqarfimmit tamatumunnga akuersissuteqartumit taamaallaat akuerisaavoq.

Imm. 2. Akuersissummi erseqqissumik allamik allassimasoqanngippat, ikiaroornartunik nakorsaasiornikkut immikkut sulianik imaluunniit poortorneqaqqaarneriniit ammarneqarsimanngitsunik allanik, tiguneqarnerisulli poortorsimallutik tuniniaqqinneqartussanik aammalu poortoqqinneqanngitsunik oqimaalutaqqinneqanngitsunilluunniit nunami maani niueruteqarnissaq akuersissummi matumani taamaallaat pineqarpoq. Akuersissummit allamik allassimasoqanngippat tassunga aamma ilaanngilaq ikiaroornartunik eqqussisinnaaneq imaluunniit annissisinnaaneq.

Imm. 3. Ikiaroornartunik niuernissamut akuersissut, akuersissummi erseqqissumik allamik allassimasoqanngippat, akuersissummi allassimasumiit najukkamiit niuernermut killeqartinneqarpoq. Immikkoortortaniit niuerneq immikkut akuersissuteqarnermik pisariaqartitsivoq taamaallaallu pingaarnertut quersuarmit tiguneqartuniit poortukkanit ammarneqanngitsuniit pisinnaalluni.

Eqqussineq annissinerlu

§ 8. Ikiaroornartunik allattorsimaffimmi A-mi, B-mi, C-mi, D-mi aamma E-mi allassimasunik eqqussineq annissinerlu nakorsaait pillugit inatsisartut peqqussutaat naapertorlugu matumunnga malittarisassat aalajangersarneqartut naapertorlugit taamaallaat akuerisaapput.

Imm. 2. Imm. 1 ikiaroornartunut allattorsimaffinni D-mi aamma E-mi allassimasunut, matumunnga aalajangersakkat aalajangersarneqartut naapertorlugit umiarsuarni nakorsaataasivinniittunut imaluunniit timmisartuni ikiueqqaarnermi karsiniittunut imaluunniit Naalagaaffeqatigiinnermi ilaaniittunut nassiussinernut atuutinngilaq.

§ 9. Nunatsinni Nakorsaaneqarfik allattorsimaffik B-mi nr. 59-imi allanneqartunut eqqaanartunik taakkuninngalu sanaanik uumasunit naasunilluunniit nakorsaatinik, tetrahydrocannabinolimik annerpaamik oqimaassusaata 0,2 pct.-ianik akulinnik eqqussinermut akuersissuteqarsinnaavoq.

Imm. 2. Imm. 1 naapertorlugu akuersissutit taamaallaat inatsisitigut pisinnaatitaasunut pisussaaititaasunullu nalunaarutigineqarsinnaapput.

Imm. 3. Imm. 1 naapertorlugu inatsisitigut pisussaaititaasut uumasunit naasunilluunniit nakorsaatinik eqqussinissamut akuerineqarsimasut akisussaaffigivaat, tunisassianut eqqunneqartunut tamanut

tetrahydrocannabinolimi annerpaamik oqimaassusaata 0,2 procentianik akulinnut killissarititaasoq malinneqassasoq.

Imm. 4. Akuersissummik pissarsinermi piumasaqaatit Nunatta nakorsaaneqarfianit suliarineqassapput. Akuersissummik naammassinnittoqanngippat Nunatta Nakorsaaneqarfiata akuersissut atorunnaarsissinnaavaa.

§ 10. Ikiaroornartunik eqqussineq aamma annissineq taamaallaat Naalagaaffeqatigiinnerup iluani nuna ataaseq aqqutigalugu pisinnaavoq.

Sananeq, naatitsineq poortueqqinnerlu

§ 11. Ikiaroornartunik allattorsimaffinni A-mi, B-mi, C-mi, D-mi aamma E-mi allanneqarsimasunik naatitsineq sananerluunniit, imatut paasillugu ikiaroornartunik kemi atorlugu allanngortitsinikkut imaluunniit pinngortitameersunik sanaassanit immikkoortitsinikkut ikiaroornartunik taama ittunik pilersitsinerit kiisalu ikiaroornartunik taama ittunik allanngortitsinerit nakorsaatit pillugit inatsisartut inatsisaat naapertorlugu matumunnga malittarisassat atuuttut naapertorlugit taamaallaat akuerisaapput.

Imm. 2. Imm. 1 aamma ikiaroornartunik misileraalluni naatitsinernut, sananernut imaluunniit allanngortinniarnernut atorneqarpoq.

Imm. 3. Imm. 1-imi taaneqartutut suliaqarnermi, inuit susassaqaanngitsut ikiaroornartunut periarfissaqassanngillat aamma ikiaroornartunik taama ittunik peqquserlulluni ilanngaasoqarnissaata pinaveersaartinnissaanik qulakkeerinninniarluni nakkutiginnittoqassalluni.

Imm. 4. Imm. 1-imi taaneqartunik ikiaroornartunik poortukkat niuertarfinnut niuertunillu pilersuisunut naatsorsuutigineqartut imatut matoqqassapput poortukkap ammarneqarsimanera ajornanngitsumik takuneqarsinnaalluni.

Imm. 5. Imm. 1-imi aamma 2-mi aalajangersakkat pisortanit pigineqartuni pinngortitalerinikkut, nakorsaanermit ilisimatusarfinni atortorissaarutitigullu laboratoriani ingerlataqarfinnilu ilisimasartusarnissaq siunertarlugu allattuiffik D-mi aamma E-mi ikiaroornartunik allassimasunik sananermut imaluunniit allanngortitsinermut atorneqassanngillat.

Naatsorsuutit

§ 12. Nunatta Nakorsaataasivia, nunap immikkoortuini napparsimmaviit, uumasut nakorsaat kiisalu umiarsuit naalagai aamma timmisartuni ikiueqqaarnerni atortunut akisussaasut nakorsaatit pillugit inatsisartut peqqussutaat naapertorlugu aalajangersarneqartuni tamanna pillugu malittarisassat qaqugukkulluunniit atuuttut naapertorlugit allattorsimaffik A-mi, B-mi, C-mi, D-mi aamma E-mi allassimasunik ikiaroornartunik uninngasuutit pillugit naatsorsuusiortassapput.

Imm. 2. Inuit, suliffeqarfiit, laboratoriat ingerlataqarfiillu Nunatsinni Nakorsaaneqarfimmit imm. 1-imi allanneqarsimasunik ikiaroornartunik ingerlataqarnissamut akuersissuteqartut ikiaroornartut pillugit imatut naatsorsuusiortassapput, paasissutissat uku qaqugukkulluunniit takuneqarsinnaassallutik:

1) Pisineq, tassunga ilanngullugu eqqussineq, suuneri, annertussusii, pilersuisoq, toqqorsivimmut eqqunneranut ulloq, akiligassamut innersuussineq eqqussinermilu uppersaatiip normua allassimassallutik.

- 2) Tunisineq, tassunga ilanngullugu annissineq, nr. 1-imi allanneqarsimasunut naapertuuttumik allanneqartut.
 - 3) Piareersakkanut atuineq. Piareersakkanik sananerni tamani ikiaroornartunik aamma naasunit nakorsaasiassanik atuineq pillugu naatsorsuusiortoqassaaq. Piareersakkat nalunaarummi matumani aalajangersakkanut tunngasut eqqarsaatigalugit, piareersakkanit pineqartunit iluanaarutit aamma sananermi immiinermilu takorluukkatut iluanaarutinit nikingassutaasut allanneqassapput.
 - 4) Oqimaalutaanermi takorluukkatut iluanaarutinit nikinganerit imaluunniit tunisassatut eqqarsaatigineqartunik ikiaroornartunik pineqartunik mikininngorlugit aggorlugit immiinerit.
 - 5) Piareersakkanik nr. 3-mi taaneqartunik, imm. 1-imi ikiaroornartunut taaneqartunut ilaatinneqanngitsunik taakkunanngalu annissinissamut akuersissuteqartariaqanngitsunik annissineq.
 - 6) Misissueqqissaarnermik siunertaqartumik atuineq aamma suunera, annertussusaa aamma atuinerit ataasiakkaat ullui allanneqarlutik misileraanerit misissueqqissaarnermik imaluunniit ikiaroornartup pineqartup atorineqarsimaneranut misiliinerimik nalinginnaasumik uppersaasumik allaaserinninneq.
 - 7) Ikiaroornartut eqqaaneqartut aserorterneqartut annertussusii.
 - 8) Ikiaroornartunut allanut imaluunniit ikiaroornartuunngitsunik allanik allanngineq ikiaroornartut taaneqartut annertussusii suunerilu kiisalu taakkunannga pissarsiat.
 - 9) Ikiaroornartut eqqaaneqartut sananeqartut imaluunniit naatinneqartut annertussusii.
 - 10) Ikiaroornartunik taaneqartunik sananermi atorineqartut immikkut atortussiat annertussusii.
 - 11) Toqqorsivinni pigineqartut ikiaroornartut taaneqartut annertussusii, imatut immikkoortiterneqarlutik takuneqarsinnaalluni ikiaroornartut imaluunniit naasunit nakorsaasiassat pigineqarnersut, suliarineqarnersut, piareersarneqarlutik naammassineqarsimasut aamma tuniniagassatut poortorneqarsimallutik naammassisimasut qanoq annertutigisut.
 - 12) Ikiaroornartunik taaneqartunik naatitsinermi atorineqartut naasut annertussusii.
- Imm. 3.* Imm. 1-imi ikiaroornartut immikkoortortat aqqutigalugit niuerutigineqarpata taakku immikkut naatsorsuusiorneqassapput.
- Imm. 4.* Ikiaroornartunik imm. 1-imi taaneqartunik suliaqarnermut tunngatillugu naatsorsuutit allallu allagaatit sivikinnerpaamik ukiuni pingasuni toqqorsimaneqassapput.
- Imm. 5.* Imm. 1-imi taaneqartunut ikiaroornartunut tunngasunik toqqorsivinniittunik naatsorsuineq akuttunngitsumik isumagineqartassaaq, taamaattorli qaammatini pingasukkaani ikinnerpaamik ataasiarluni.

Ikiaroornartunik ingerlataqarfiit allat

§ 13. Annissinermut eqqussuinermillu, pilersuinermit, sananermi imaluunniit niuernermit allaanerusumik ikiaroornartunik ingerlataqarnerit allat Nunatsinni Nakorsaaneqarfimmit tamatumunnga akuersissuteqartunit inunnut, suliffeqarfinnut, laboratorianut ingerlataqarfinnullu taamaallaat akuerisaavoq.

Imm. 2. Imm. 1-imi aalajangersagaq apeqqutaatinnagu pisortanit pigineqartut pinngortitalerinikkut, nakorsatut ilisimatusarnermi atortorissaarutigullu laboratorianut ingerlataqarfinnullu, ingerlataqarfiup nalinginnaasumik suliaqarfiata iluaniittunut siunertanut ikiaroornartunik immikkut akuersissuteqarnani atuisoqarsinnaavoq.

§ 14. Ikiaroorartunik suliaqarnissamut akuersissut Nunatsinni Nakorsaaneqarfimmit nalunaarutigineqarsimasooq qaqugukkulluunniit atorunnaarsinneqarsinnaavoq. Akuersissummut atasut naammasseqqusat piumasaqaatillu eqqortinneqarsimanngippata, Nunatsinni Nakorsaaneqarfiup nakkutilliisuanit peqqussutaasut malinneqarsimanngippata, imaluunniit ikiaroorartunik suliaqarnerup isumaginerani mianersortoqarsimanngippat imaluunniit sumiginnaasoqarsimappat akuersissutip nalunaarutaasimasup atorunnaarsinneqarnissaa naatsorsuutigineqarsinnaavoq.

Imm. 2. Nunatsinni Nakorsaaneqarfiup ikiaroorartunik suliaqarnissamut akuersissut nalunaarutigineqarsimasooq qaqugukkulluunniit killilersinnaavaa imaluunniit allanngortissinnaavaa.

Imm. 3. Ikiaroorartunik suliaqarnissamut akuersissummik nalunaarutigineqarsimasumik utertitsisoqarpat ikiaroorartunik uninngasuutit qanoq pineqassanersut pillugit Nunatta Nakorsaataasivia erseqqinnerusumik aalajangersaasinnaavoq.

Nakkutilliineq

§ 15. Suliffeqarfiit, laboratoriat ingerlataqarfiillu ikiaroorartumik suliaqarnissamut Nunatsinni Nakorsaaneqarfimmit akuersissuteqartut ikiaroorartut eqqortumik isumaginissaannut akisussaasumik inummik toqqaassapput.

§ 16. Nunatta Nakorsaataasivia, nunap immikkoortuini napparsimmaviit, peqqissaaviillu ikiaroorartunik suliaqarnerannik Nunatsinni Nakorsaaneqarfik nakkutilliissaaq.

Imm. 2. Matumunnga malittarisassat atuuttut naapertorlugit uumasut nakorsaasa ikiaroorartunik ingerlataqarnerannik nakkutilliisoqassaaq.

Imm. 3. Ikiaroorartunik suliaqarnissamut Nunatsinni Nakorsaaneqarfimmit immikkut akuersissuteqartunik inunnik, suliffeqarfinnik aamma laboratorianik Nunatsinni Nakorsaaneqarfik nakkutilliissaaq.

Imm. 4. Nunatsinni Nakorsaaneqarfik pisortat pinngortitalerinikkut, nakorsatut ilisimatusarnermi atortorissaarutitigullu laboratoriat ingerlataqarfiillu ikiaroorartunik suliaqarnerannik nakkutilliisinnaavoq.

Imm. 5. Pisariaqarsorineqarpat naapertuussorineqarpallu nakkutilliinermik oqartussaasut allat imm. 2-mi taaneqartutut nakkutilliissasut Nunatta Nakorsaaneqarfiata aalajangersinnaavaa.

Imm. 6. Nakkutilliinerit imm. 1-4-mi eqqaaneqartut pisariaqartinneqartutut akulikitsigisumik ingerlanneqassapput. Oqartussat nakkutilliisut ininut, uninngasuutinut, atuakkanut niuerneramilu pappiaqqanut, suliaqarnermut pineqartumut tunngatillugu nakkutilliinissamut pisariallit akornuserneqaratik pissarsiarisinnaavaat.

Imm. 7. Inuk, suliffeqarfimmik piginnittoq, laboratoriami imaluunniit ingerlataqarfimmi aqutsisoq nakkutilliisup kissaatigisinnaasaanik ikiaroorartunik suliaqarnermut tunngasunik paasissutissanik tunniussinissamut qaqugukkulluunniit pisussaaffeqarpoq.

Imm. 8. Amigaatit, nakkutilliinermi uppersarsarneqartut ingerlaannartumik iluarsineqassapput.

§ 17. Nunatsinni Nakorsaaneqarfik § 5-imit, § 10-mit, § 12, imm. 2-mit, 4-mit aamma 5-imit aammalu § 15-imit immikkut akuersissuteqarsinnaavoq, akuersissut peqqissutsitigut aarlerinartutut pingaarutilittut nalilerneqanngippat pissutsillu immikkut ittut matumunnga pissutissaqartitsippata.

Pineqaatissiissutit

§ 18. §§ 2-8-mik aamma § 9, imm. 3-mik, § 10-mik, § 11-imik, 12, imm. 2-5-imik, § 13, imm. 1-imik, § 14 imm. 3-mik, § 15-imik, aamma § 16, imm. 7-imik, aamma 8-mik unioqqutitsisoq pinerluttulerinermi inatsit malillugu pineqaatissinneqarsinnaavoq.

Atulernera

§ 19. Nalunaarut 16. november 2023-mi atuutilissaaq.

Imm. 2. Tamatuma peqatigisaanik Ikiaroornartut pillugit Namminersorlutik Oqartussat nalunaarutaat nr. 40, 23.decembari 2022-meersoq atorunnaarsinneqarpoq.

Namminersorlutik Oqartussat, ulloq 15. november 2023

Agathe Fontain (atsior.)

Peqqissutsimut Naalakkersuisoq

/ Nike Berthelsen (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

